

دار قهوة الأدباء للنشر والتوزيع الإلكتروني

كتاب / حين يهمس القلب

الكاتب / محمود بكر

محتوي الكتاب/: خواطر و اقتباسات

تنسيق وديزين/مروة جمال

مراجعة/منصة مكتبه الكتب

دار: قهوة الأدباء للنشر الإلكتروني

## حقوق النشر محفوظة ©

### الكاتب " محمود بكر

جميع الحقوق محفوظة. لا يجوز نسخ أي جزء من هذا الكتاب أو تخزينه في نظام استرجاع، أو نقله بأي شكل أو بأي وسيلة، سواء كانت إلكترونية أو ورقية إلا بموافقة الدار رسمياً، بما في ذلك التصوير أو التسجيل أو أي وسيلة أخرى، دون إذن كتابي مسبق من المؤلف.

يُسمح بالاقْتباس القصير لأغراض النقد أو المراجعة مع الإشارة إلى المصدر والمؤلف

# الكاتب محمود بكر

كاتب وشاعر بحكي بالكلمات عن اللي بنحسه ومش دايمًا بنعرف نقوله.  
خريج كلية تمريض، يمكن عشان كده عندي شغف إنني أكتب عن الجروح  
اللي مبتبانس، اللي جوه القلوب والعقول ، بحب الحروف اللي تحتوي،  
وتدقي، وتطبطب قبل ما تنصح.  
بكتب عشان كل حد حس بالوحدة وسط الناس، وعشان اللي عنده كلام  
متكتم جواه ومش لاقى حد يسمعه.  
بحاول بكلماتي أكون الحزن اللي في كتاب، والصديق اللي مش بيزهق من  
الكلام.  
لو لقيت نفسك في اللي بكتبه، ف- اعرف إنك مش لوحده.

## المقدمة:

في حاجات جوانا، بنحسها بس مش بنعرف نحكيها... حاجات بنفتكرها في عز الليل، وتخبط على باب قلبنا من غير استئذان. حاجات كنا فاكرينها خلصت، لكنها لسه عايشة في ملامحنا، في نظرتنا للأماكن، في الأغاني اللي بتعدي علينا فجأة وتاخدنا معها لزمان تاني.

الكتاب ده مش مجرد خواطر... دي مشاهد صغيرة من حياتنا، لقطات محجوزة جوه القلب، صوت حد كان معنا واختفى، لحظة فرح عدت بسرعة، كلمة اتحبست في الحلق، وذكرى بتوجعنا بس بنحبها.

كل صفحة هنا ممكن تلاقي فيها نفسك، في كلمة كنت محتاج تسمعها، في إحساس افتكرته مات، في حكاية شبيهة بحكايتك...

لأننا في الآخر مش لوحدنا، وكل اللي جوانا، فيه حد تاني حاسس بيه بس مش قادر يعبر عنه.

فلو لقيت نفسك في سطر، أو حسيت إن الكلام طبطب عليك... يبقى أنا وصلت.

# 1

## حين همست الحياة

في لحظة هادية، بين همس الريح وهدوء الليل، لمحت الحياة بتبص لي، كأنها عاوزه تهمس بحاجة.

قربت منها بحذر، سألتها بصوت مليان فضول: "إيه؟ عاوزه تقولي حاجة؟" ابتسمت ابتسامة مالهاش شكل، بس حسيتها.. وقالت لي: "فاكر المرات اللي كنت بتحس إنك تايه؟ اللي كنت بتسأل فيها نفسك: هو أنا في المكان الصح؟ هو ده الطريق اللي كان المفروض أمشي فيه؟"

آه.. فاكر، فاكر كويس.. فاكر الليالي اللي كنت بطلع فيها النّفس بالعافية، والأيام اللي حسيت فيها إن قلبي أتقل من إنه يشيل نفسه. كنت بمشي في الدنيا وأنا مش متأكد إذا كنت رايح ولا راجع، كنت حاسس إنني عايش وخلص.

كملت الحياة كلامها وقالت:

"كل اللحظات اللي حيرتك، كل الأيام اللي حسيت فيها إنك مش مفهوم، كل حاجة وقفت قدامك كأنها سد، كانت بتقودك لهنأ.. للحظة دي.. للمكان ده.. للنسخة دي منك."

سكتت شوية، كأنها بتديني فرصة أفكر.. وبعدها قالت لي:

"إنت فاكر الأيام اللي بكيث فيها؟ كل حاجة وجعتك؟

اللي كسرك واللي لمك؟ كل ده، كان بيجهزك للحاجة اللي جاية.."

ساعتها حسيت بحاجة غريبة.. كأن كل اللي عدي كان له معنى، كأن كل لحظة وجع كانت بتبني فيّ حاجة، حتى لو ما كنتش شايفها وقتها.

عارف؟

يمكن الحياة ما قالتليش أسرار الكون، وما دتنيش خريطة توصلني لكل

الإجابات، بس في اللحظة دي، فهمت حاجة واحدة بس..

الحياة مش دايماً بتهمس، بس لما تعملها.. لازم تسمعها كويس.

## 2

### رسالة لن تصل

عارف يعني إيه تكتب رسالة وإنت عارف إنها مش هتوصل؟  
إنك تفضل تكتب وتكتب، وكل كلمة تحسها بتنزف من قلبك، بس في الآخر  
تقفل الورقة أو تسيب المسج من غير إرسال؟

أنا عملت كده ألف مرة، كتبت لك وأنا بترعش من الشوق، ومسحت وأنا  
بترعش من الوجد، كل مرة كنت بحاول أقول حاجة، كنت بحس إن الكلام  
مالوش لازمة.. مش هيغير حاجة، مش هيرجع حاجة، ومش هيوصل حتى.  
كنت فاكّر إن البُعد بييجي فجأة.. زي الباب اللي بيتقفل مرة واحدة، زي النور  
اللي بيتطفى من غير إنذار.

## دار قهوة الأدباء للنشر والتوزيع الإلكتروني

بس اكتشفت إنه بيجي على مراحل.. ببدا من كلمة ما اتقالتش، من مكالمة ما جتتش، من "وحشتني" اترد عليها بابتسامه باردة، لحد ما في يوم تلاقي نفسك بتكتب رسالة زي دي، وأنت عارف إنها مش هتتوصل.

زمان كنت بخاف من الفراق، دلوقتي عرفت إن الفراق الحقيقي مش إنك تمشي، الفراق الحقيقي إنك تفضل موجود بس مش هنا.. إن اسمك لسه في تليفوني، بس ما بقتش أقدر أكلمك، وإن ذكرياتك لسه في قلبي، بس أنا مش جوه قلبك.

### عارف؟

يمكن لو الرسالة دي وصلت لك، مش هتفرق معاك، يمكن تقراها بعين باردة وقلب مستريح، ويمكن ما تقراهاش أصلا.. بس لو بالصدفة، لو بأي معجزة، يوم تفتحها، اعرف إنني كنت مستني.. بس خلاص، بطلت.

### 3

## حكاية مقعد فارغ

في كل مكان كنا بنروحه سوا، كان في مقعد بيبقى محجوز ليك.. مش بالحجز الفعلي، بس بالحضور، بالضحكة اللي كانت بتسبقك، بالطريقة اللي كنت بتسند بيها ضهرك عليه كأنك امتلكته للأبد.

كان في مكان محدد لك في حياتي، عارفه ومتعود عليه، عمري ما فكرت إنه ممكن يفضى.

بس قضي المقعد لسه زي ما هو.. نفس الشكل، نفس الزاوية اللي كنت بتفضلها، نفس المسافة اللي كنت بتسيبها بيني وبينك وأنا مستني كلمة تظمن، كل حاجة زي ما كانت، إلا أنت.. مفيش حد يقعد فيه، مفيش صوت ينادي عليا باسمي بالطريقة اللي كنت بتنادي بيها.

## دار قهوة الأدباء للنشر والتوزيع الإلكتروني

الغريب إن الناس مش بتاخذ بالها من المقاعد الفارغة، بيعدّوا عليها كأنها مجرد كرسي عادي، بيدوروا على أقرب مكان فاضي من غير ما يحسوا إنه كان ليه صاحب.. لكن أنا واخذ بالي، أنا شايف الغياب، سامعه، حاسه في كل تفصيلة.

زمان كنت بقول لنفسي إن في حاجات مش ممكن تختفي، في ناس مش ممكن تغيب.. كنت غلطان لأن في حاجات بتختفي وإحنا شايفينها، وناس بتمشي وإحنا مش قادرين نوقفهم.

الكرسي لسه هناك.. مستني حد يقعد عليه، بس محدش هيقعد، لأن في مقاعد بتفضل فارغة حتى لو مليها ألف حد.

## 4

### ما لم يُقال

في حاجات بنشيلها في قلوبنا، مش لأنها مش مهمة، بالعكس.. لأنها أثقل من إنها تتقال، حاجات بتقف على طرف لسانا، بس نبلعها في آخر لحظة، خايفين من رد مش مستعدين نسمعه، أو يمكن خايفين من الحقيقة اللي هتحصل بعدها.

فاكر لما كنت عاوز أقول لك "ما تمشيش"؟

بس قلتها في سري، قلتها وأنا ببص في الأرض، وأنا بأمثل إني عادي، وأنا بأسمع صوت خطواتك بتبعد وأنا ثابت في مكاني كأني متجمد كان ممكن أقولها، بس ما قلتش.. لأنه كان في صوت جوايا بيقول لي:  
"وماذا بعد؟" هل كنت هتفضل؟

هل كنت هتبطل تبعد وأنت أصلا بقالك كتير ماشي وأنا مش واخد بالي؟

## دار قهوة الأدباء للنشر والتوزيع الإلكتروني

وفي مرة ثانية، كنت عاوز أقول لك "وحشتني"، بس بدلها سألتك عن الجو  
كنت عاوز أقول لك "لسه بحبك"، بس قلت "عامل إيه؟"  
كأن الفرق بينهم بسيط، كأن المعاني ما بتتغيرش بين كلمة والثانية.

عارف يعني إيه تكون مليات كلام، بس متكتف بالصمت؟  
إنك تعيش حياتك وسط ألف كلمة ما اتقالتش، وسط رسائل اتكتبت  
وما تبتعتش، وسط حكايات ماتت قبل ما تتولد؟

إحنا مشينا، واللي بينا انتهى، بس اللي ما اتقالش، لسه عايش.. وده أصعب  
من أي وداع.

## 5

### وجه آخر للحنين

الناس دائماً بتتكلم عن الحنين كأنه شيء جميل، كأنه حزن دافي من الذكريات، كأنه طريق بيرجعنا لأيام كنا فيها أسعد.. بس محدش بيقول لنا إن الحنين له وجه ثاني، وجه مَر، موجه، بيتحول مع الوقت لعبء ثقيل على القلب.

الحنين الحقيقي مش بس إنك تفتكر، الحنين هو إنك تفتكر وتعرف إنك مش هتعيش ده ثاني، إنك مهما قفلت عيونك وحاولت ترجع، مش هتلاقي نفس الشعور، نفس الأماكن، ونفس الأشخاص، الحنين مش بس شوق، الحنين فقدان، فقدان لحاجة كانت جزء منك وبقت ذكرى بعيدة، لحاجة كنت فاكر إنها هتفضل للأبد، لكنها اختفت في غفلة منك.

## دار قهوة الأدباء للنشر والتوزيع الإلكتروني

عارف لما تمشي في شارع كنت بتعدّي فيه مع حد بتحبّه، تحس كأنك بتدور عليه بين الوجوه، رغم إنك عارف إنه مش هناك؟

عارف لما تسمع أغنية كانت بتجمعكم، تحس إنها دلوقتي بتوجعك أكثر ما بتمسك؟

الحنين ده مش دفء، الحنين ده برد.. برد في وسط الصيف، فراغ وسط الزحمة، صمت وسط الضحك.

زمان كنت بافتكر إن الحنين حاجة حلوة، كنت بفتكر إن لما نفتكر حد، يبقى لسه معانا بطريقة ما.. بس دلوقتي عرفت إن الحنين أحيانًا بيكون سجن، وإن في ذكريات مش لازم نرجع لها، لأنها مش بترجعنا لفرح، لكنها بترجعنا للحظة فقدان، للحظة وداع.. للحظة إحنا أصلاً بنحاول نهرب منها.

## 6

### نحن والمرايا

المرايا عمرها ما كانت مجرد زجاج ينعكس ملامحنا.. المرايا أصدق من الناس، بتكشف لنا حاجات إحنا بنحاول نهرب منها، بتورينا نفسنا من غير أقنعة، من غير تصنع، من غير الكذب اللي بنحاول نقنع بيه نفسنا كل يوم.

كم مرة وقفت قدام المرايا وبصيت لنفسك؟

بصيت بجد، مش مجرد نظرة سريعة علشان تعدل شعرك أو تشوف هدومك؟

كم مرة لمحت في عيونك حاجة ما كنتش مستعد تواجهها؟

نظرة تعب، خوف، خيبة، أو حتى وحدة مش عارف تهرب منها؟

المرايا ساعات بتكون صديق، وساعات بتكون عدو.. بتساعدنا نشوف الحقيقة، لكنها في نفس الوقت بتفضح كل اللي كنا بنحاول نخبئه، بنضحك وسط الناس، ونرجع البيت نبص فيها نلاقي وشنا متغير، ملامحنا ثقيلة، وضحكتنا اللي كانت من شوية بقت ذكرى مالهش أثر.

### عارف المشكلة فين؟

المشكلة إننا بنشوف نفسنا في عيون الناس أكثر ما بنشوفها في المرايا، بنصدق رأيهم فينا، حتى لو كان غلط، بنحاول نكون الصورة اللي هما عاوزينها، وننسى الصورة الحقيقية اللي قدامنا.

بنجري ورا القبول، ورا الحب، ورا الإعجاب، لحد ما في يوم نقف قدام المرايا وما نعرفش الشخص اللي واقف قدامنا.

بس مهما هربنا، المرايا مش بتكذب.. بتفضل هناك، في ركن الأوضة، مستنيانا نواجه نفسنا يوم ما نكون مستعدين.. أو يوم ما نبطل نهرب.

## 7

### حين يصبح الصمت لغة

في أوقات، الكلام ما يببقاش ليه معنى.. مهما حاولت تشرح، مهما رتبت الحروف، تحس إنها مش قادرة توصل اللي جواك، كأن المعاني اللي جوه قلبك أكبر بكتير من أي كلمات ممكن تتقال وساعتها، يببقى الصمت هو الحل الوحيد.

الصمت مش دايمًا هروب، ساعات بيكون صرخة، بس من غير صوت، لما تبقى موجوع ومش عارف تحكي، لما تبقى مخنوق بس الكلام ثقيل على لسانك، لما تبقى محتاج حد يفهمك من غير ما تتكلم، ويعرف إنك مش بخير حتى لو ما قلتش ولا كلمة.

في ناس بتفتكر إن الصمت ضعف، لكن الحقيقة إن الصمت أوقات بيكون أقوى من أي كلام، بيكون دليل إنك تعبت من الشرح، من التبدير، من العتاب اللي ما بقاش ليه فائدة، بيكون طريقك الوحيد علشان تحافظ على اللي فاضل منك، على كرامتك، على قلبك اللي اتوجع كفاية.

عارف الإحساس ده؟ لما حد يسألك "مالك؟"

وترد بكلمة واحدة: "مفيش" .. رغم إن جواك ألف حاجة؟

عارف لما تبقى قاعد وسط الناس وساكت، مش علشان مش عاوز تتكلم،

لكن لأنك حاسس إن حتى لو اتكلمت، محدش هيفهم؟

أوقات الصمت بيكون الوداع الأخير، بيكون الجواب اللي مش محتاج حروف

، بيكون النهاية اللي ما اتقالتش، لكنها اتفهمت .. بصمت.

## 8

### قلوب كالأوطان

في ناس وجودهم في حياتنا زي الأوطان، لما نكون معاهم نحس بالأمان، نحس إننا مش لوحدنا، وإنه مهما الدنيا خدتنا ودورت بينا، هنلاقيهم مستنيين ناس قلوبهم واسعة كفاية تشيل ضعفنا، خوفنا، حكاوينا اللي محدش يعرفها غيرهم.

لكن المشكلة إن مش كل الأوطان بتفضل مفتوحة لينا، في أوطان بنتهدم، في أوطان بتقفل أبوابها في وشنا، وفي أوطان إحنا بنفسنا اضطرينا نمشي منها، رغم إننا ما كناش عاوزين نسيبها.

عارف إحساس إنك كنت فاكرا إن عندك مكان ترجع له، ولما حاولت ترجع لقيته مش موجود؟

لقيت اللي فيه اتغيروا، أو قرروا إنك ما عدتش تنتمي ليهم؟

## دار قهوة الأدباء للنشر والتوزيع الإلكتروني

ده أصعب نوع من الفقد، إنك تفقد حد كان بالنسباك وطن، حد كنت بتحس معاه إنك في بيتك، وفجأة تلاقي نفسك غريب، واقف على بابيه، مش عارف تدخل، ومش قادر تمشي.

مش كل القلوب اللي حبتنا، تفضل مفتوحة لينا.. ومش كل وطن سكنا، هيفضل لينا للأبد بعض الأوطان بنسيب فيها جزء منا، ونمشي واحنا عارفين إننا مهما حاولنا نرجع، عمرنا ما هنلاقي نفس الشعور تاني.

## 9

### محطات مؤقتة

في ناس بتمر في حياتنا زي المحطات، نقابلهم في لحظة، نعيش معاهم وقت حلو، نحس إننا أخيراً لقينا اللي كنا بندور عليه، ونصدق إن الرحلة هتكتمل بيهم.. لكن فجأة، ومن غير مقدمات، المحطة بتنتهي، وهم بينزلوا، وإحنا نكمل لوحدنا.

عارف الإحساس ده؟

لما حد يدخل حياتك ويغير فيها حاجات كتير، يلون أيامك، يدك طاقة وأمل، يخليك تصدق في فكرة الأبدية، وبعدين يختفي؟  
مش لازم يكون الغياب بسبب خلاف، ممكن يكون القدر، ممكن تكون الظروف، ممكن يكون حتى اختيارهم، بس في كل الحالات.. الوجدع واحد.

## دار قهوة الأدباء للنشر والتوزيع الإلكتروني

أوقات بتتعلق بالناس أكثر ما لازم، بنحط فيهم جزء من قلبنا، ونبني عليهم أحلام كثير، من غير ما نفكر إنهم مجرد محطة، وإن الرحلة مش هتقف عندهم بس المشكلة مش في الفراق، المشكلة في الحنين اللي بيجي بعدها، في الذكريات اللي مش بتموت، في الأماكن اللي بتشهد على وجودهم حتى بعد ما يمشوا.

بس بيني وبينك.. رغم الوجد، في حاجة جميلة في المحطات دي، إنهم بيفضلوا جوانا، حتى لو ما كانوا لينا، إنهم سابوا أثر، وإنهم - ولو للحظات - كانوا سبب في إننا نحس بالسعادة يمكن الرحلة ما كملتش، بس يكفي إنهم كانوا جزء منها.. ولو مؤقتًا.

## 10

### أنا كما لا تعرفني

في كل واحد فينا نسخة محدث يعرفها، حتى أقرب الناس ليه النسخة اللي بتظهر لما يكون لوحده، بعيد عن الزحمة، بعيد عن التوقعات، بعيد عن الصورة اللي الكل متعود يشوفها. النسخة اللي مش مضطرة تضحك وهي موجوعة، ولا تتظاهر بالقوة وهي هشة من جواها.

أنا مش دايمًا الشخص اللي بيبان قدام الناس، مش دايمًا البسمة اللي بتترسم تلقائي، ولا الثقة اللي بتظهر في الكلام. في حاجات جوايا محدث يعرفها، أحلام متدفنة، خيبات مكسرة، وحزن ملوش ملامح واضحة في ليالي طويلة عدت فيها لوحدي، في قرارات خدتها وكنت عارف إنني هتحمل نتيجتها لوحدي، في حكايات عشتها ومحدث كان موجود يسمعها.

عارف الإحساس ده؟

إنك تبقى وسط ناس كتير، بس لسه حاسس بوحدة غريبة؟

إنك تضحك على نكتة، بس جواك حاجة بتوقع؟  
إنك تبقى سند الكل، لكن وقت ما تقع، ما تلاقيش حد يسندك؟

أنا كما لا تعرفني.. مش مجرد شخص بيظهر للناس، أنا الحكايات اللي ما  
اتحكتش، الدموع اللي ما نزلتش، الكلمات اللي اتحبست في القلب وما لقتش  
طريق للخروج أنا اللي كنت محتاج حد يفهمني من غير ما أشرح، حد  
يشوفني بجد، بعيد عن أي توقعات، حد يعرفني.. زي ما أنا.

## 11

### حين نخسر أنفسنا

في حاجات كثير ممكن نخسرها في الحياة.. أشخاص، فرص، أحلام، لكن أصعب خسارة هي لما نخسر أنفسنا، لما نبص في المراية وما نعرفش مين اللي واقف قدامنا، لما نحس إن اللي كنا عليه زمان مجرد ذكرى بعيدة، وإن اللي بقينا عليه دلوقتي مش إحنا.

إحساس إنك تفضل تتغير غصب عنك، مش علشان عاوز، لكن علشان الظروف فرضت عليك، علشان الوجد غيرك، علشان الخذلان قسّاك، علشان كل مرة حاولت تفضل زي ما انت، لقيت الدنيا بتضغط عليك أكثر.

عارف لما تبقى نفسك تضحك من قلبك، بس مش قادر؟  
لما تحس إنك عايش يوم ورا يوم، بس من غير ما تحس بالحياة؟  
لما تفضل تقول "أنا كويس"، وانت من جواك مش عارف انت مين؟

في لحظة معينة، بنلاقي نفسنا تايهين، بندور علينا في كلام زمان، في ذكريات كانت مليانة دفاء، في أحلام كنا بنشوفها قريبة، وبقينا نحس إنها مستحيلة بنقعد مع نفسنا ونسأل:

"هو أنا بجد كده؟"

هو ده اللي كنت عاوز أوصله؟

ولا أنا بس كنت بحاول ما أتوجعش أكثر؟"

وأصعب حاجة؟

إنك تفضل تحارب علشان تلاقي نفسك تاني، بس تكتشف إنك خسرت منها كثير، وإن حتى لو رجعت.. مش هتبقى زي الأول.

## 12

### لو عاد الزمان

كم مرة قعدت لوحذك، وافتكرت موقف معين، وقلت: "يا ريتني كنت قلت كذا بدل كذا"، "يا ريتني ما مشيتش"، "يا ريتني ما صدقتش"، "يا ريتني كنت لحقت اللحظة قبل ما تفوت"؟

أوقات كثير بنفتكر حاجات حصلت، ونحس بندم غريب، ندم على فرصة راحت، على حب فرطنا فيه، على شخص كان بيستاهل نبقي جنبه بس سبناه، أو على حد أدينا كل حاجة واكتشفنا إنه ما يستاهلش.

لو عاد الزمان، كنت هحزن الناس اللي حبتني بصدق أكثر، كنت هقول لكل حد فارقني إنه غالي، كنت هعتذر أسرع، كنت هضحك أكثر، وهزعل أقل، كنت هحتفظ بالحاجات اللي فرطت فيها وأنا فاكر إنها هتفضل موجودة.

لكن الحقيقة اللي كلنا عارفينها.. إن الزمن ما بيرجعش، والفرص اللي بتضيع مش دايمًا بترجع، والناس اللي بتمشي.. مش كلهم بيرجعوا كل اللي في إيدنا إننا نتعلم، إننا نحاول نعيش اللحظة قبل ما تتحول لذكرى، إننا نحب بصدق، ونعتذر لو غلطنا، ونمسك في اللي يستحق، علشان ما نرجعش بعد سنين نقول.. "لو عاد الزمان".

## 13

### وجه لا أنساه

في ناس بنقابلها في حياتنا وبتعدي، وناس بنفتكرها كل فترة ونقول: "يا ترى أخبارهم إيه؟" لكن في شخص واحد.. مهما مرت الأيام، مهما حاولنا ننسى، ملامحه بتفضل محفورة جوانا، صوته لسه بنسمعه في لحظات السكون، ضحكته بتظهر في خيالنا من غير ما نقصد، وكأنه عمره ما مشي، وكأنه لسه هنا.

يمكن يكون حب قديم، يمكن صديق بعد عننا فجأة، يمكن حد كان بيحسنا بالأمان، وبعدين سابنا من غير مقدمات بس في النهاية..

هو الوجه اللي مهما حاولنا ننساه، بنلاقيه بيطاردنا في كل تفصيلة صغيرة، في شارع كنا بنمشي فيه سوا، في أغنية كانت بتعجبه، في كلمة كان بيقولها دايماً، في لحظة بنتمنهاها ترجع ولو ثانية.

مش كل حد فارقنا نقدر ننساه، ومش كل غياب معناه اختفاء في ناس بتمشي بجسمها، لكن بتفضل روحها جوانا، بتفضل ذكرى بتعيش معانا، بتوجعنا أحياناً، وتدفينا أحياناً، لكن مستحيل.. مستحيل ننساها.

## 14

### قلوب باردة

في ناس لما يتبعد عنك، بتحس إن في جزء منك اتكسر، في ناس لما بتغيب،  
بتحس إن الدنيا بقت أهدي بزيادة، بس في ناس.. لما بتفارقك، بتحس إن  
قلبك اتجمد.

عارف الشعور ده؟

إنك تحب حد بكل ما فيك، تدي من قلبك، تحارب، تتمسك، وفي الآخر تلا  
قيه بيتعامل معاك ببرود، كأنك ما كنتش حاجة مهمة، كأن كل اللي بينكم  
مجرد لحظة وعدت الناس دي..

قلوبهم مش حجر، بس كأنهم فقدوا القدرة على الإحساس، كأن الدفا بقى  
شيء مش مفهوم ليهم، وكأن الحب مجرد كلمة بتنقال من غير ما تتحس.

في مرة كنت مستعد تدي روحك، وهمّ ما كانوا مستعدين حتى يدوك  
لحظة اهتمام كنت بتدور عليهم في كل تفصيلا، وهمّ ما شافوش وجودك  
أصلا "كنت بتحس بيهم قبل ما يتكلموا، وهمّ ما فكروا حتى يسألوا  
"عامل إيه؟".

أكثر حاجة توجع؟

مش الفراق، ولا البعد، ولا حتى النسيان.. أكثر حاجة توجع إنك تكتشف إن  
اللي كان دافئ في حضنك، كان بارد في قلبه وإنك كنت بتحب لوحدك..  
طول الوقت.

## 15

### بين الحب والخوف

الحب؟

كلمة سهلة، بنسمعها كل يوم، بنشوفها في الأفلام، بنقراها في الروايات، لكن الحقيقة؟ الحب مش مجرد كلمة.. الحب حاجة بتخض، حاجة تخليك ضعيف قدام شخص واحد، قادر يهدك بكلمة، ويرفعك بنظرة.

الخوف؟

هو الضريبة اللي بندفعها لما نحب بجد. بنخاف نتمسك بحد ويفلت من أيدينا، بنخاف نحط قلبنا عند حد ويكسره، بنخاف ندي كل حاجة ونفضل في الآخر بإيدين فاضية.

عارف الإحساس ده؟ لما تحب حد بس كل لحظة حلوة بتفكر بعدها: "طب وبعدين؟"

، "هتفضل كده ولا هيمشي؟"، "هو حاسس زيّ ما أنا حاسس؟"، "طب لو بعد، هقدر أنسى؟".

نفضل عايشين بين القلب اللي بيقول "سيب نفسك"، والعقل اللي بيقول "خد بالك" بين الشوق اللي بيشدنا، والخوف اللي بيشدنا لورا بين لحظات بنحس فيها إننا أسعد ناس في الدنيا، ولحظات تانية بنحس إننا مش مستعدين للوجع اللي ممكن ييجي بعد السعادة.

بس في النهاية.. الحب يستاهل، حتى لو وجعنا، حتى لو خوفنا، لأنه الحاجة الوحيدة اللي لما نحسها بجد، بنعرف إننا عشنا.

## 16

### سؤال بلا إجابة

ليه كل الحاجات الحلوة مش بتكمل؟

ليه الناس اللي بتحبنا بجد.. إما بتبعد، أو بتتغير؟

ليه بنلاقي نفسنا في لحظة بنسأل: "إحنا ازاي وصلنا لكده؟".

في ناس دخلوا حياتنا، خلونا نحس إننا مميزين، إننا مفهومين، إننا محبوبين ، وبعدين؟ فجأة، بلا مقدمات، بقى في مسافة، في صمت، في حاجة ناقصة، ومهما حاولنا نفهم.. مفيش إجابة.

بنتحايل على الذكريات، ندور على أي سبب، نقنع نفسنا إن يمكن إحنا اللي غلطنا، يمكن الظروف، يمكن.. يمكن.. لكن الحقيقة إن في حاجات مش بتتفسر، في قلوب بتبطل تحب من غير سبب واضح، في مشاعر بتموت من غير ما تدي إنذار.

وأكثر حاجة بتوجع؟ مش الفراق، ولا البعد.. الوجد الحقيقي هو الأسئلة اللي ملهاش رد، اللي بتفضل جواك، تلف وتدور، وتكسر حاجة فيك كل مرة تسألها وماتلاقيش جواب.

17

## بيننا ألف عتاب

مش كل حد بعد عنك.. نسيك، ومش كل حد ساكت.. مش موجهوع، في ناس جواها ألف كلمة، وألف عتاب، بس اختارت الصمت، مش ضعف.. بس تعب. في حاجات كتير كنت عايز أقولها، لحظات عدت وسكت، مش لأن العتاب مش مهم، لكن لأن مفيش وجع أكبر من إنك تحس إن كلامك مش هيفرق، وإن اللي قدامك مش هيسمعك بنفس القلب اللي كان بيسمعك زمان.

عارف الشعور ده؟

لما تكون مليون بالكلام، بس تحبس جواك كل حاجة، لأنك خلاص فقدت

الأمل إن اللي بينكم ممكن يرجع زي الأول؟

العتاب عمره ما كان ضعف، العتاب معناه إنك لسه فارق معايا، إنك لسه جوا قلبي، وإنك مهما بعدت، لسه ليك مكان.. بس لما يوصل الإنسان لمرحلة إنه يبطل يعاتب، يبقى خلاص.. الوجة انتصر، والسكة اللي كانت بتجمعنا.. انتهت.

## 18.

### حين يتحدث الليل

في النهار، بنمثل إننا تمام، بنضحك، بنتكلم، بننشغل بأي حاجة علشان ما نسمعش اللي جوانا، لكن أول ما الدنيا تهدي.. ويجي الليل، كل حاجة بنهرب منها بتصحى.

الليل صديق القلوب الثقيلة، اللي شايلة وجع محدش حاسس بيه، اللي بتضحك في وش الناس وتنام على دمة مش باينة الليل مش بيجامل، مش بيهون، بالعكس.. بيجيب كل الذكريات قدامك، يفتش في اللي حاولت تنساه ، ويقعدك مع نفسك غصب عنك.

في ناس الليل بالنسبة لهم راحة، وفي ناس الليل بالنسبة لهم محكمة، بيحاسبوا نفسهم فيه على كل حاجة.. "ليه سبت؟"

"ليه استنيت؟"، "ليه تعلقت؟"، "ليه ما فهمتش بدري؟"

وأكثر حاجة توجع؟ إن الليل يعرفك الحقيقة اللي بتهرب منها طول اليوم.. إنك وحيد أكثر مما كنت فاكرك، وإن الحاجات اللي كسرتك، لسه جواك..

مستنياك أول ما تطفى النور.

## 19

### وجوه عابرة

في حياتنا، ناس كثير عدّوا.. بعضهم ساب أثر، وبعضهم كان مجرد ملامح اتنسيت مع الوقت ناس وقفوا جنبنا يوم، وناس كنا فاكريتهم هيفضلوا العمر كله.. واكتشفنا إنهم مجرد وجوه عابرة.

الغريب إن في ناس شفناهم مرة واحدة بس، لكن فضلوا في ذاكرتنا أكثر من ناس عاشوا معنا سنين كلمة من شخص غريب، نظرة من حد في الشارع، ضحكة صادقة في يوم صعب.. حاجات صغيرة، بس بتفضل محفورة جوانا. وفي المقابل، في ناس كنا بنحبهم بزيادة، عشنا معاهم حكايات، افكرنا إنهم جزء من حياتنا للأبد، وفجأة.. بقوا زي الغرباء، لا سلام، لا كلام، كأنهم ماكانوش هنا يوم.

الدنيا غريبة.. الناس اللي بنتمسك بيهم، ساعات بيبقوا أقل حد يستحق التمسك، واللي افكرناهم عابرين.. ساعات بيفضلوا جوانا للأبد، حتى لو ماعرفناش أساميهم.

## 20

### ذاكرة العطر

في حاجات بتختفي من حياتنا، ناس بتبعد، أماكن بتتغير، كلمات بتتنسى، لكن في حاجة واحدة مش بتموت أبداً.. ريحة الذكريات.

عارف الإحساس ده؟

لما تعدّي جنب حد حاطط نفس العطر اللي كان بيستخدمه شخص غاب عنك، وفجأة.. الزمن يرجع بيك، تحس كأنه واقف جنبك، كأن كل حاجة راجعة من تاني.

العطر مش مجرد ريحة، هو قصة كاملة محبوسة في زجاجة، لحظة حب، لحظة فراق، حزن دافي، لقاء أخير، وعد ما اتنفذش، نظرة أخيرة.. حاجات كتير بنفتكرها أول ما نشم ريحة معينة، وكأن الذاكرة كلها بتتفك في لحظة. وأكثر حاجة توجع؟

إنك تقعد تدور على العطر ده في أي مكان، بس مش علشان تشتريه، لا.. علشان تحس للحظة إن اللي راح، لسه موجود.. حتى لو في الهوى.

## 21

### أحاديث بلا صوت

مش كل الكلام بيتقال، في كلام بيتحس.. بيتقال في نظرة، في لمسة عابرة، في نفس عميق قبل ما حد يسبك ويمشي.

في حاجات كتير ما قدرناش نعبر عنها، مش لأننا ما كناش عايزين، لكن لأننا كنا عارفين إن مفيش فايدة، إن حتى لو اتكلمنا، اللي قدامنا مش هيفهم، أو مش هيهتم.

عارف الشعور ده؟

لما تبص لحد بكل مشاعرك، بكل وجعك، وكل اللي بيطلع منك هو سكوت؟ لما تتمنى إن حد يسمعك من غير ما تتكلم، يفهمك من غير ما تشرح؟

بس الحقيقة المؤلمة.. إن مش كل الناس بتسمع الصمت، في ناس محتاجة الكلام بالحروف، وناس حتى لو صرخت مش هيفهموك.

وفي الآخر، بنلاقي نفسنا بنتكلم جوه قلبنا، بنرمي الكلام للفراغ، وبنكمل وكأن مفيش حاجة.. كأن السكوت كان هو الحل الوحيد من البداية.

## 22

### رسائل لم تفتح

في درج مقفول، في موبايل قديم، في صندوق تحت السرير.. فيه رسائل مكتوبة بس عمرها ما وصلت، كلمات اتكتبت بصدق، بوجع، بحب، لكن فضلت محبوسة، مستنية حد يقرأها.

في رسالة كنا هنقول فيها "وحشتني"، بس كرامتنا منعتنا.

في رسالة كتبنا فيها "سامحني"، بس الخوف من الرفض خلانا نمسحها.

في رسالة فيها "لسه بحبك"، بس الزمن علمنا إن مش كل الحب لازم يتقال.

وفي رسائل تانية.. إحنا نفسنا كنا مستنيينها، رسائل ماجتش، كلمات كانت هتغير حاجات كثير، بس فضلت تايهة في طريقها.

المؤلم إننا أحيانًا بنحتاج بس جملة واحدة، كلمة واحدة، لكن بنفضل العمر كله مستنيينها، وفي الآخر.. بنكتشف إننا كنا بتتعلق بأمل مش موجود، وإن أقسى الرسائل.. هي اللي ماتكتبتش أصلًا.

## 23

### لو كانوا هنا

في ناس بيمشوا من حياتنا، وسواء كانوا اختاروا يمشوا، أو الدنيا خدتهم، أو القدر خطفهم.. الفراغ اللي بيسيويه بيعيش معنا للأبد.

تخيل لو كانوا هنا؟

لو كان في حد يسمع الحكايات اللي كنا عايزين نحكيها؟ لو كانت الضحكة اللي اتعودنا عليها لسه موجودة؟ لو كانت الإيد اللي كانت بتطبطب علينا ما اختفتش؟

في ليالي كتير بنسرح، نعيش سيناريوهات ماحصلتش، "ماذا لو؟"، بس الحقيقة بتكون أقسى من أي سيناريو.. إنهم مش هنا، ومهما حاولنا نخلق لهم وجود، هنفضل لوحدنا في مواجهة الغياب.

وأكثر حاجة توجع؟ إننا بعد وقت، مش بننسى الأشخاص.. بس بنتعود على الغياب، بنتعلم نعيش من غيرهم، حتى لو جزء منا فضل ناقص، حتى لو في كل لحظة، بنتمتم في سرنا.. "لو كانوا هنا".

## 24

### أنا والوقت

في حاجات كثير بتتغير مع الزمن، ملامحنا، أفكارنا، أحلامنا.. حتى إحساسنا بالحياة.

زمان كنا بنشوف الدنيا واسعة، الأيام مليانة فرص، الوقت كان معنا، مش ضدنا كنا بنفتكر إننا لو ضيعنا لحظة، فيه ألف لحظة تانية مستنيانا.

دلوقتي؟ بقينا نجري ورا الوقت، نحاول نلحق اللي فات، نحسب الأيام اللي ضاعت، نحس إن العمر بيجري أسرع من قدرتنا على استيعابه.

في لحظات معينة، بنقف ونسأل نفسنا: "إحنا وصلنا لحد هنا إزاي؟"

"إيه اللي ضاع؟"، "إيه اللي كسبناه؟"

بس أكثر سؤال بيطاردنا.. "هل لسه في وقت؟"

والمؤلم؟

إننا دايمًا بنفهم قيمة الوقت بعد فوات الأوان، بعد ما يفوت الفرص، بعد ما يسرق الناس، بعد ما يعلمنا الدرس اللي كان المفروض نفهمه من زمان.

## 25

### سر بيني وبينني

في حاجات جوانا محدش يعرفها، أسرار مخبّية جوه القلب، حاجات بنحاول نقنع نفسنا إنها مش موجودة، بس كل ما نقفل عليها، تفضل تخبط وتطلب تطلع للنور.

في سر مالوش اسم، لكنه بيصحيك في نص الليل ويخليك تسرح في السقف، في سر ثقيل، بتحس بيه في ضلوعك كل ما تحاول تنساه، وفي سر.. هو انت نفسك، انت الحقيقي، بعيد عن كل الأقنعة اللي لبستها عشان تمشي في الدنيا.

بس أكثر سر مؤلم؟ هو اللي مش قادر تعترف بيه حتى لنفسك، اللي كل ما تيجي تواجهه، تهرب، تلهي نفسك، تحاول تقنع روحك إنه مش مهم.. مع إنك عارف إنه كل حاجة.

والحقيقة؟ إن في أسرار مهما خبيناها، عمرها ما بتموت، بتفضل تعيش جوانا، تكبر معانا، وتفضل سر.. بيننا وبين نفسنا، للأبد.

## 26.

### كل شيء مؤقت

كل حاجة في الدنيا ليها وقت.. الفرحة، الحزن، الحب، الفراق.. حتى إحنا، عابرين في الحياة، زي محطات بنعدي عليها ونسيب وراها أثر خفيف، أحيانًا يتنسى، وأحيانًا يفضل للأبد.

افتكرت اللحظات اللي كنت فاكرها هتفضل معايا دايماً؟ الناس اللي وعدوني إنهم مش هيمشوا؟ الضحكة اللي كنت واثق إنها مش هتنطفئ؟ كل حاجة كانت مؤقتة، حتى اللي كنت شايفه ثابت، حتى اللي كنت متعلق بيه كأنه حياتي كلها.

يمكن المشكلة مش في الدنيا، المشكلة فينا إحنا.. اللي بنحاول نمسك حاجات مكتوب لها تفلت، اللي بنتعلق بأشخاص مقدر لهم يبعدوا، اللي بندي قلوبنا لحاجات نهايتها الرحيل.

بس يمكن ده الدرس.. إننا نتعلم نعيش اللحظة، نستمتع بيها، ونسيبها تمشي من غير ما نحاول نحبسها لأن كل شيء مؤقت.. وده مش ضعف، ده الحقيقة.

## 27

### حلم لم يكتمل

في أحلام بتتولد جوانا وتكبر مع كل نفس بناخده، بنرسم تفاصيلها في خيالنا، نعيشها قبل ما تحصل، نحسها حقيقة قبل ما تبقى واقع.

بس في أحلام.. بتقف في النص، ما بتكملش، تتكسر قبل ما توصل، تفضل مجرد فكرة معلقة بين "كان ممكن" و"بس ما حصلش".

أصعب حاجة؟

إنك تشوف الحلم قدامك وما تقدرش توصله، تفضل تمد إيدك ليه وهو كل مرة يبعد أكثر، لحد ما في يوم تستوعب إنه خلاص.. انتهى.

بس اللي بيوجع أكثر؟ إن الحلم نفسه ما بيموتش.. بيفضل جوه القلب، عايش في حنة صغيرة، يظهر في لحظات الوحدة، يطل عليك في منتصف الليل، يهمس لك:

"تفتكر لو كملت، كان هيبقى عامل إزاي؟"

وهنا الوجع الحقيقي.. إنك مش هتعرف الإجابة أبدًا.

## 28.

### حين تبتسم الذكريات

الغريب في الذكريات إنها مش بتختفي، حتى اللي حاولنا نهرب منها، حتى اللي وجعتنا، بتفضل موجودة، بس بتتغير مع الوقت.

زمان، كانت الذكرى دي بتوجع، كانت بتخفق، كانت كل ما تيجي في بالك تحس إنك عايز تهرب، بس دلوقتي؟ بقت مجرد ابتسامة هادية، ابتسامة فيها شجن، فيها حنين، بس مفيهاش ألم زي الأول.

يمكن لأن الزمن بيهدّي النار اللي جوانا، أو يمكن لأننا اتعلمنا نتقبل، أو يمكن لأننا خلاص فقدنا القوة اللي كانت بتخلينا نقاومها.

في ذكريات لما نفتكرها، نحس بحرقة، وفي ذكريات لما نفتكرها، نحس بحنين، لكن في نوع نادر من الذكريات.. بيخلينا نبتسم، ابتسامة صغيرة، كأننا بنقول لها: "كنتي وجع، وبقيتي مجرد ذكرى.. بس جميلة."

## 29

### بين القلب والعقل

في جوايا صوتين، واحد بيشدني وواحد يبيعدني..  
قلبي بيقولي: "ارجع، متسيبش، الحب يستاهل إنك تحارب عشانه."  
وعقلي بيرد: "متنساش الوجع، متنساش إزاي خسرت نفسك وأنت بتحاول  
تكسبه."  
قلبي بيحلف لي إن في أمل، وإن اللي بيننا مش حاجة تتعوض.  
وعقلي بيفكرني إن الحب لوحده مش كفاية، وإن في حاجات لما تتكسر..  
عمرها ما بترجع زي الأول.  
طول الوقت بينهم.. قلبي بيشتاق، وعقلي بيقاوم، قلبي عايز يجري، وعقلي  
رابط رجلي بالأرض.  
بس عارف إيه المشكلة؟  
إنه رغم كل ده، القلب دايمًا بيكسب في النهاية.

30

## حين ينطفئ النور

في لحظات في حياتنا، النور بيظفي. مش نور الغرفة ولا الشارع، لكن النور اللي جوانا، اللي كان مخلينا نشوف الحياة بشكل مختلف.

زمان كنت بحس إن الدنيا واسعة، إن الفرص كتير، إن الأحلام ممكن تتحقق، بس في لحظة ما، النور بدأ يبهت، الألوان بقت باهتة، والضحكة فقدت معناها.

مش لازم يكون السبب حاجة كبيرة.. أوقات كتير بتبقى حاجات صغيرة، خيبات متراكمة، وعود اتكسرت، ناس اختفت، ومشاعر بردت.. لحد ما تلاقي نفسك قاعد في الضلمة، مش عارف حتى لو كنت عايز تنور النور تاني ولا لأ.

بس تعرف أكثر حاجة مخيفة؟

إنك تتعود على العتمة.. وتنسى أصلا ً كان شكل النور عامل إزاي.

## 31

### درس متأخر

في حاجات ما بنتعلمهاش غير بعد فوات الأوان، بعد ما نخسر، بعد ما نقع، بعد ما نجرب كل الطرق الغلط.

كنت فاكر إن الناس اللي بتحبنا هتفضل موجودة، وإن الفرص اللي راحت ممكن ترجع، وإن في وقت لكل حاجة.. بس الحياة علمتني إن مش كل حاجة ليها تعويض، وإن في حاجات لما تروح، بتروح للأبد.

اتعلمت إن مش كل حد ضحك ليّا كان صادق، وإن مش كل وعد اتقال كان حقيقي، وإن في ناس بتعرف تمشي كأنها ما كانتش هنا أصلاً.

وأكثر حاجة وجعتني؟

إني اتعلمت ده كله.. متأخر جداً.

## 32

### قلوب لا تنسى

في ناس بنقابلها في حياتنا وتعدي، تسيب أثر خفيف، ذكرى عابرة، كلمة لطيفة، وبعدين تختفي كأنها ما كانتش هنا.

وفي ناس.. حتى لو بعدت، حتى لو اختفت سنين، مستحيل ننساها.

مش شرط يكونوا كانوا الأحن، ولا الأوفى، ولا حتى الأفضل، بس كانوا

الأعمق.. دخلوا جوا روحنا بطريقة محدش غيرهم عرفها.

ممکن يكون حد حبنا بصدق، أو حد كان سند وقت ما الدنيا وقعت فوق

دماغنا، أو حتى حد عرفنا نفسنا أكثر..

ناس، لما نفتكرهم، نحس بغصة، بحنين، بوجع حلو، بفراغ عمره ما اتملا

بعدهم.

الناس دي، لو حتى راحت من حياتنا..

مش ممكن تروح من قلبنا.

## 33

### وحدني ولكن...

الوحدة مش إنك تكون لوحديك، الوحدة إنك تكون وسط الناس وتحس إن مفيش حد شايفك.

ممکن تضحك، تهزر، تتكلم، بس جواك في فراغ.. فراغ محدش حاسس بيه غيرك.

تحاول تشرح، بس تلاقي الكلام واقف في حلقك، تحاول تلاقي حد يسمعك بجد، بس تكتشف إن الكل مشغول بنفسه، وإنك مجرد صوت بيعدي جنبهم. الوحدة مش إن مفيش حد حوالياك..

الوحدة الحقيقية إنك تبقى وسط الناس، بس قلبك لوحده.. لوحده تمامًا.

## 34

### لماذا أنت؟

ليه لما بفتكر كل الناس، بفتكر أنت الأول؟

ليه كل الذكريات ليها لون باهت إلا اللي كانت معاك، لسه واضحة، لسه بتوجع، ولسه بتضحكني؟

ليه لما بسمع أغنية قديمة، بتفكرني بيك؟ ليه الأماكن اللي عدينا عليها لسه بتحمل ريحتك؟ ليه كل الحاجات اللي حبيتها بقت توجعني بعدك؟  
مش كنت عابر زي الباقيين، مش كنت حد ممكن أنساه مع الوقت، كنت أكثر، كنت أثر، كنت حاجة من روحي، والروح.. مبتتنسيش.

فـ ليه أنت؟

وليه بعد كل السنين، لسه مفيش إجابة؟

## 35

### نقطة ومن أول السطر

في لحظة معينة، بتحس إنك وصلت للنهاية، إن مفيش حاجة تكمل، إن الحكاية خلصت، وإن اللي راح مش هيرجع.

بتحزن، بتنهار، بتفتكر إن دي النهاية الحقيقية، بس بعد وقت، بعد دموع كتير، بعد ليالي طويلة من التفكير، تكتشف إن الحياة موقفتش..

يمكن الحكاية اللي فاتت كانت صعبة، يمكن الوجدع كان حقيقي، بس دايمًا في فرصة ثانية، بداية جديدة، صفحة بيضا مستنياك تكتبها.

مفيش حاجة بتنتهي فعلاً، في بس "نقطة"...

ومن أول السطر.

## 36

### حين تسقط الأقنعة

كلنا بنبلس أقنعة، مش عشان نخدع، لكن عشان نحمي نفسنا..  
بنضحك واحنا موجهوعين، بنقول "أنا بخير" واحنا أبعد ما يكون عن الخير،  
بنمثل القوة واحنا جواّنا ضعف مكسرنا.  
بس في لحظة معينة، بتسقط الأقنعة.. لحظة خيانة، لحظة وداع، لحظة خذلا  
ن، أو حتى لحظة تعب حقيقي مخلينا مش قادرين نكمل التمثيل.  
ساعتها، بنشوف الحقيقة.. حقيقتنا، وحقيقة اللي حوالينا.  
وفي أوقات، الحقيقة بتكون أبشع مما تخيلنا.

37

## ظل في الذاكرة

في حاجات بتختفي من حياتنا بسهولة، أشخاص، أماكن، حتى الأيام نفسها.. بتروح، بنفتكرها فترة وبعدها تبتهت، تبقى مجرد ذكرى بعيدة مالهاش طعم و لا لون.

لكن في حاجات تانية، حتى لو عدى العمر، حتى لو الدنيا خدتنا في ألف طريق غير اللي كنا فيه، تفضل محفورة جوانا كأنها حصلت امبارح.

ممکن تكون ضحكة من حد ماعدش موجود، كلمة اتقالت في لحظة غيرت مصيرنا، لمسة طبطبت علينا في وقت كنا محتاجين فيه حد يسندنا، أو حتى لحظة وداع لسه بتوجع زي أول مرة، الذكريات دي مبتختفيش، مابتبهاش، متتحولش لسراب..

## دار قهوة الأدباء للنشر والتوزيع الإلكتروني

بتفضل زي الظل، ماشية جنبنا في كل خطوة، بتطلّ علينا في لحظات الهدوء ، بترجعنا سنين لورا من كلمة، من أغنية، من ريحة عابرة في الشارع.  
في ناس ممكن ننسى ملامحهم، ننسى أصواتهم، ننسى وجودهم في حياتنا أصلاً..

لكن أثرهم؟

بيفضل حي، بيعيش جوانا حتى لو هم نفسهم بطلوا يفتكرونا.

## 38

### أحببتك بصمتي

في ناس بيحبوا بصوت عالي، بكلام كثير، بوعود مالهاش نهاية..  
وفي ناس بيحبوا بصمت، من بعيد، من غير ما يقولوا ولا كلمة، لكن بيحسوا  
بكل حاجة، ويعطوا من غير مقابل.  
أنا كنت من النوع الثاني.. كنت بشوفك بتتكلم وأحفظ تفاصيل صوتك، كنت  
بسمع ضحكك وأحس إن الدنيا لسه فيها حاجات حلوة، كنت ببقى جنبك  
في أصعب لحظاتك، حتى لو مكنتش بتأخذ بالك.  
مكنتش مستني منك حاجة، مكنتش عايز رد، ولا حتى نظرة امتنان..  
كل اللي كنت محتاجه هو إنك تفضل بخير، حتى لو مش معايا.  
وفي الآخر.. فضلت ساكت، سبتك تمشي من غير ما تعرف، من غير ما تحس،  
من غير ما تدرك إن في حد حبك بصدق.. لكن في صمت.

## 39

### كلنا غرباء

تفتكر إيه اللي بيخلي حد قريب؟

الكلام؟ العشرة؟ الذكريات؟

ولا الإحساس إنك مفهوم من غير ما تشرح؟

الغريب مش اللي متعرفوش، الغريب هو اللي تبقى قاعد معاه سنين، ويفضل

جواك إحساس إنك لو اتكلمت، مش هيفهمك.. لو بكيت، مش هيحس بيك..

ولو اختفيت، مش هيفرق معاه.

كلنا غرباء..

غرباء في بيوت مليانة ناس، غرباء وسط أصحاب عمرنا، غرباء حتى وسط

ضحكنا العالي، وسط الحواديت اللي بنحكيها عشان نهرب من الحقيقة.

## دار قهوة الأدباء للنشر والتوزيع الإلكتروني

الغربة مش مكان، الغربة شعور..

إنك تبقى موجود، بس مش محسوب.

تحاول توصل، بس مفيش حد مستنيك.

وفي الآخر، تتعود..

تتعلم تبقى لوحداك حتى لو كنت وسط زحمة..

تتعلم تسمع نفسك لما كل الأصوات حواليك تبقى مزعجة بس مش حقيقية..

وتفهم إن مفيش حد هيكون ليك وطن، غير قلبك.

40

## دائرة الرحيل

كل حاجة في الدنيا راحلة، الأشخاص، اللحظات، حتى إحساسنا بالحاجات اللي كنا بنحبها.. كل حاجة بتيجي لحظة وتختفي.

حد بيختار يمشي، وحد يمشي غصب عنه.. حد يفضل بس مش هو نفس الشخص اللي عرفناه، وحد بيتحول لذكرى باهتة مهما حاولنا نتمسك بيه.

والغريب إننا كل مرة بنحسها كأنها أول مرة!

كأننا مش متعودين على الرحيل، كأننا مش عارفين إنه جزء من الحياة، كأننا مش فاهمين إن حتى إحنا هنكون ذكرى في يوم من الأيام.

يمكن المشكلة مش في الرحيل نفسه..

المشكلة في الفراغ اللي بيسيّبوا وراهم، في الأماكن اللي بتمتلئ بصدى غيابهم، في الذكريات اللي بتفضل تعيد نفسها جوه دماغنا كأنها مش راضية تمشي معاهم.

وفي النهاية، بندور في نفس الدائرة.. حد ييجي، حد يسيب، حد يختفي، وحد يفضل جوانا حتى لو مش موجود.

41.

## أحلام للبيع

فاكر لما كنا صغيرين؟ لما كنا بنحلم من غير خوف، بنرسم المستقبل بألوان زاهية، وبنصدق إننا هنقدر نوصل لكل حاجة؟  
كبرنا..

واكتشفنا إن الأحلام مش مجانية، وإن كل حلم ليه تمن، وإن في أحلام غالية أوي، لدرجة إننا مقدرناش ندفعها.  
في ناس باعت وقتها، في ناس باعت راحتها، وفي ناس باعت نفسها بالكامل عشان توصل..

وفي ناس.. باعت أحلامها عشان تفضل عايشة.  
مش كل اللي استسلم كان ضعيف، أحيانًا الظروف بتكون أقوى من أي إرادة، وأحيانًا الحياة بتسرقنا لدرجة إننا بننسى إحنا كنا عايزين إيه أصلاً.  
والوجع الحقيقي مش في الأحلام اللي راحت..

الوجع في اللحظة اللي بنبص فيها في المرآة، ونسأل نفسنا: "هو إحنا كنا فين، وبقينا فين؟"

42.

## حين نصبح بلا ماضي

في لحظة معينة، بنبص حوالبنا ونكتشف إن مفيش حاجة فضلت زي ما كانت..

الأماكن اللي كنا بنحس فيها بالأمان بقت مجرد جدران باردة، الناس اللي كنا بنحكي لهم أسرارنا بقوا غرباء، والذكريات اللي كنا بنتمسك بيها بقت كأنها حصلت لحد ثاني غيرنا.

إحنا مش نفسنا..

مش الشخص اللي كان بيحلم زمان، مش اللي كان بيضحك من قلبه، مش اللي كان بيصدق إن بعض العلاقات مبتنتهيش.

كل حاجة بتتغير..

مش فجأة، لكن بالتدريج، لحد ما نلاقي نفسنا قاعدين وسط حاجات عمرنا ما تخيلنا إنها هتحصل، مع ناس عمرنا ما افكرنا إنهم هيبقوا مجرد أسماء في سجل الماضي.

وفي اللحظة دي..

مش بنحس إننا خسرنا حد، قد ما بنحس إننا خسرنا نفسنا في الطريق.

بقينا ناس من غير ماضي..

أو يمكن ماضينا هو اللي بقى من غيرنا.

## 43

### منطقة رمادية

مش كل حاجة في الدنيا أبيض أو أسود.. في حاجات كتير في النص، في المنطقة الرمادية اللي محدش بيعرف يوصفها، لا حب ولا كره، لا بُعد ولا قرب، لا بداية ولا نهاية.

العلاقات اللي مش عارفين نصنفها، الأشخاص اللي مش قادرين نستغنى عنهم ولا نتمسك بيهم، المشاعر اللي مش مفهومة، والقرارات اللي واقفة على الحياد.

في حد بيبقى موجود بس مش موجود، في كلمة عالطرف اللسان بس مش بتتقال، في وعد بيتقال من غير نية، وفي اعتذار مش كامل، في حاجة ناقصة في كل حاجة.

وأكثر حاجة موجعة في المنطقة الرمادية..

إنها بتستهلكنا، تفضل تشدنا للوراء وتمنعنا نتحرك للأمام، تخلينا عايشين في دوامة من التساؤلات اللي عمرها ما هتلاقي إجابة.



دار قهوة الأدباء للنشر والتوزيع الإلكتروني

يمكن الأبيض والأسود فيهم حسم..

لكن الرمادي؟

الرمادي ده عذاب بطيء، يثبك القلب قبل العقل، ويسيبه متعلق بحاجة..

مش موجودة أصلاً .

44.

## متى نرتاح؟

إحنا تعبانيين..

مش بس من الشغل أو المسئوليات، إحنا تعبانيين من التفكير اللي مبيسكتش، من القلق اللي بينام جنبنا كل ليلة، من الأحلام اللي بتتسرق قبل حتى ما نوصل لها.

تعبنا من العلاقات اللي بتأخذ منا أكثر ما بتدي، من الوعود اللي عمرها ما اتحققت، من المحاولات اللي فشلت، ومن الفرص اللي راحت ومش راجعة.

بقينا بنضحك بس مش من قلبنا، بنعيش بس مش مبسوطين، بنحاول نكمل بس مش عارفين إحنا مكملين ليه، كل يوم بنسأل نفسنا نفس السؤال

"هو إمتى هنرتاح؟" لكن الحقيقة اللي بنهرب منها..

إن الراحة مش مكان نوصل له، الراحة قرار جوانا، وإننا مش هنلاقيها طول ما إحنا مستنيين حد يحققها لنا، أو حاجة تحصل تغير حياتنا.

يمكن الراحة الحقيقية..

هي إننا نبطل ندور عليها في المكان الغلط.

45

## رسالة لنفسي

إزيك؟

عارف إنك تعبت، وإنك وصلت لمرحلة مش قادر تشرح فيها اللي جواك، وإن كل حاجة بقت ثقيلة على قلبك.. حتى الحاجات اللي كنت بتحبها زمان. أنا مش هطلب منك تبقى قوي، ولا أقولك متستسلمش، لإن الحقيقة إنك لو كنت تقدر تعمل كده.. مكنتش وصلت للمرحلة دي.

بس عايز أقولك حاجة..

إنت مش لوحده، حتى لو حسيت إن الدنيا كلها بعدت عنك، حتى لو كل الناس اللي كنت فاكلهم ضهرك مشيت، لسه جواك نفسك.. ولسه فيك حنة بتقاوم.



## دار قهوة الأدباء للنشر والتوزيع الإلكتروني

متجلدش نفسك على اللي فات، متعاتبهاش على القرارات الغلط، متفضلش عايش في دور الشخص اللي كان لازم يكون أحسن.. لإنك عملت اللي كنت تقدر عليه في وقتها.

خد وقتك، ابكي لو محتاج، اختفي لو لازم، بس متنساش إنك تستحق تبقى بخير، حتى لو الدنيا كلها قالت غير كده.

وفي الآخر، لما تبقى جاهز ترجع..

ارجع أقوى، مش عشان حد، بس عشان نفسك اللي استحملت كثير، وجيه الوقت اللي تستحق فيه تهدي وتلاقي السلام اللي بتدور عليه.

46.

## أيام ضائعة

في أيام بتعدي من غير ما نحس بيها، زي ورق بيتقلب في رواية مملة، متكررة، مفيهاش جديد أيام بتعدي وإحنا لسه في نفس الدائرة، نفس الروتين، نفس الوجدع اللي بنحاول نهرب منه بس بيلاحقنا في كل لحظة سكون.

في لحظات بنصحى فيها ونسأل نفسنا:

"إحنا وصلنا لحد فين؟"

بس الإجابة بتكون صمت طويل.. لإننا ببساطة محلك سر.

إحنا ضيعنا كام فرصة؟ فوتنا كام لحظة سعادة كنا نقدر نعيشها؟ بعدنا عن كام شخص كان المفروض نتمسك بيه؟

كام مرة سيبنا الدنيا تاخدنا، ونسينا نفسنا في الزحمة؟

في أيام ضاعت منا..

بس اللي مخيف بجد، إننا لسه بنضيع أكثر، وإحنا عارفين، بس ساكتين.

47.

## بين القلب والورق

في حاجات بنعرف نقولها، وفي حاجات تفضل محبوسة جوانا، مهما حاولنا نخرجها.

بس الورق.. عمره ما حكم علينا، عمره ما قال "ليه سكت كل ده؟" ولا "مش منطقي اللي بتحس بيه"، الورق كان دايمًا حزن آمن لكل المشاعر اللي ملهاش مكان.

بكتب عشان أهدي العاصفة اللي جوايا، عشان أعترف بحاجات مقدرتش أعترف بيها حتى لنفسي، عشان أواجه خوفي بالحروف، وأرسم على الورق كل السيناريوهات اللي مقدرتش أعيشها.

بكتب عن اللي وحشني، عن اللي كسرني، عن الأحلام اللي ضاعت مني، وعن اللي تمنيت يقعد بس اختار يمشي.

بكتب لأن الورق الوحيد اللي عمره ما تعب مني، الوحيد اللي فهمني من غير ما أحاول أشرح.. والوحيد اللي عمره ما مشي وسابني.

48

## حكاية لم تكتمل

مش كل الحكايات ليها نهاية، في قصص بتقف في النص.. تفضل معلقة بين الممكن والمستحيل، بين اللي كان مفروض يحصل.. واللي حصل فعلاً. كنا اتنين، ماشيين في طريق واحد، فاكرين إننا هنكمله سوا.. بس الطريق فرقنا قبل ما نوصل.

مكنش فيه وداع حقيقي، مكنش فيه كلمة "خلصت"، بس إحنا عرفنا، حسينا بالمسافة اللي كبرت بينا، بالمشاعر اللي كانت مليانة دفء وبقت باردة. بقينا نسأل عن بعض كأننا غرباء، الردود قصيرة، والضحكات ناقصة حاجة.. بقى فيه كلام كتير متقالش، وفيه مشاعر ماتت قبل ما تتولد، وبقى كل واحد فينا شايل سؤال ملهوش إجابة:

"لو كنا حاولنا أكثر، كنا هنكمل؟"

بس الحكاية..

لم تكتمل.

49.

## ربما يوماً

يمكن في يوم تفتكرني، وسط زحمة الأيام، وسط ضحكة مش كاملة، أو لحظة سكون مفاجئة. يمكن يبجي عليك وقت تسأل فيه "هو كان إيه اللي بيئا؟" بس متلاقيش إجابة واضحة، غير إحساس غريب، شبه الحنين، بس مش حنين كامل..

يمكن في يوم تلاقي نفسك بتدور على كلامي، في رسالة قديمة، أو بين سطور كتاب كنت عارف إني بحبه. يمكن تسمع أغنية كنت بسمعها، وتحس إنك فاكر الإحساس بس ناسي السبب.

يمكن في يوم تفتكر إن كان فيه حد بيحبك بجد، حد شافك بنسختك اللي محدش شافها، حد كان مستعد يديك روحه من غير ما تطلب، بس لما يحصل ده..

هكون أنا وقتها، بطلت أفتكر.

## 50

### آخر سطر في الحكاية

كل حكاية لازم توصل لآخر سطر، مهما حاولنا نطولها، مهما تمسكنا بيها، ومهما خفنا من نهايتها.

مكنتش عاوز الحكاية تخلص، كنت فاكّر إننا هنفضل نكتب فصول جديدة، إننا هنلاقي دايمًا سبب نخلي القصة مستمرة، بس اكتشفت إن بعض الحكايات نهايتها مش اختيار.. نهايتها قدر.

مكنتش عاوزك تبقى ذكرى، ولا كنت عاوز أبقى حد تقابله في أحلامه بس، كنت عاوزنا نكمل، نفضل جزء من بعض، بس الوقت خدنا، والمسافات بقت أكبر من قلوبنا، والأيام علمتنا إن مش كل اللي بنحبه بيكمل معانا.

يمكن نكون كتبنا قصة جميلة، مليانة ضحك، شغف، لحظات شبه الخيال.. بس الحكاية خلصت، وده.. كان آخر سطر فيها.

النهاية: "وبقى كل شيء ذكرى..."

## دار قهوة الأدباء للنشر والتوزيع الإلكتروني

وقفت قدام النافذة، نفس المكان اللي شهد البداية، بس المرة دي المشهد كان مختلف. الدنيا هادية بشكل غريب، مفيش صوت غير دقائق قلبي، كأن كل حاجة حواليا بتستعد تسلم نفسها للهدوء.. للرحيل.

افتكرت كل اللي فات، كل الضحكات اللي مكنتش كاملة، كل النظرات اللي قالت أكثر من الكلام، كل الأحلام اللي رسمناها مع بعض، وكل الطرق اللي كانت مفروشة بوعود ملهاش نصيب في الواقع.

مكنتش عايز أصدق إن ده النهاية، بس الحقيقة مبتستأذنش، بتيجي كده، فجأة، تخبطك في وشكك وتسيبك واقف لوحداك.

مكنتش مستني معجزة، ولا كنت مستني حد يرجع، كنت عارف إن بعض الحكايات نهايتها إنها تفضل حكايات.. تتقال في جلسات الوحدة، تتحس في نغمات الأغاني القديمة، وتتكتب في سطور مفيش حد هيقرأها غير صاحبها.

وبعد كل حاجة، مفضلش غير الذكرى...

ذكرى ناس كانوا هنا، ومشوا.

ذكرى مشاعر اتحفرت جوانا، بس بقت من الماضي، ذكرى صوت كان بيطمنا، وبقى مجرد صدى بعيد، وف الآخر، الدنيا فضلت تمشي... وكأنها مبتاخذش بالها مين كمل، ومين وقف عند آخر سطر في حكايته.

## محتويات الكتاب.....رقم الصفحة

### تعريف الكاتب

#### مقدمه

1. حين همست الحياة - عن اللحظات اللي بتغير مصيرنا.....4.
2. رسالة لن تصل - عن الكلمات اللي متحشجة في القلب ومش بنعرف نقوله.....6.
3. حكاية مقعد فارغ - عن الغياب اللي بيسبب أثره في الأماكن قبل القلوب.....8.
4. ما لم يُقال - عن المشاعر اللي بنخبها خوفًا أو عنادًا.....10.
5. وجه آخر للحنين - عن الحنين اللي مش دايماً جميل.....12.
6. نحن والمرايا - عن المسافة بيننا وبين صورتنا الحقيقية.....14.
7. حين يصبح الصمت لغة - عن اللحظات اللي الكلام فيها بيكون ملوش لازمة.....16.
8. قلوب كالأوطان - عن الناس اللي بنلاقي فيهم راحة وسكن.....18.
9. محطات مؤقتة - عن الأشخاص اللي مروا في حياتنا وفضلوا ذكرى.....20.
10. أنا كما لا تعرفني - عن الجانب اللي محدش شافه فينا.....22.
11. حين نخسر أنفسنا - عن الأيام اللي بنحس فيها إننا مش احنا.....24.
12. لو عاد الزمان - عن الاختيارات اللي بنتمنى نغيرها.....26.
13. وجه لا أنساه - عن شخص واحد محفور في الذاكرة.....27.
14. قلوب باردة - عن الناس اللي فقدوا الإحساس.....28.
15. بين الحب والخوف - عن التخبط بين الرغبة في الحب والخوف منه.....30.
16. سؤال بلا إجابة - عن التساؤلات اللي عمرها ما لقت رد.....32.
17. بيننا ألف عتاب - عن العتاب اللي اتأخر أوي.....33.
18. حين يتحدث الليل - عن الأفكار اللي بتصحى في عز الليل.....34.
19. وجوه عابرة - عن الناس اللي عدّوا في حياتنا وسابوا أثر.....35.
20. ذاكرة العطر - عن الروائح اللي بترجعنا لذكريات بعيدة.....36.

## دار قهوة الأدباء للنشر والتوزيع الإلكتروني

21. أحاديث بلا صوت - عن الكلام اللي بيتقال بالعيون بس.....37.
22. رسائل لم تفتح - عن الكلمات اللي فضلنا نحتفظ بيها.....38.
23. لو كانوا هنا - عن اللي مشيوا بدري أوي.....39.
24. أنا والوقت - عن إحساسنا إن الزمن بيجري مننا.....40.
25. سر بيني وبينني - عن الأسرار اللي حتى احنا بنخاف نعرف بيها لنفسنا.....41.
26. كل شيء مؤقت - عن الأشياء اللي كنا فاكريتها هتفضل للأبد.....42.
27. حلم لم يكتمل - عن الأحلام اللي وقفت في النص.....43.
28. حين تبتسم الذكريات - عن الماضي اللي بنفتكره بحنين حتى لو كان موجه.....44.
29. بين القلب والعقل - عن الصراع اللي عمره ما بيخلص.....45.
30. حين ينطفئ النور - عن اللحظات اللي بنحس فيها بالضياء.....46.
31. درس متأخر - عن الحكمة اللي وصلتنا بعد ما بقى فات الأوان.....47.
32. قلوب لا تنسى - عن الناس اللي مستحيل يخرجوا من القلب.....48.
33. وحدي ولكن - عن الشعور بالوحدة وسط الناس.....49.
34. لماذا أنت؟ - عن السؤال اللي محدش بيلاقي له إجابة في الحب.....50.
35. نقطة ومن أول السطر - عن البدايات الجديدة بعد الانكسار.....51.
36. حين تسقط الأقنعة - عن لحظة اكتشاف الحقيقة.....52.
37. ظل في الذاكرة - عن المواقف اللي لسه عايشة جوانا رغم مرور الزمن.....53.
38. أحببتك بصمتي - عن الحب اللي ما اتقالش أبدًا.....55.
39. كلنا غرباء - عن الإحساس إننا مش مفهومين.....56.
40. دائرة الرحيل - عن فكرة إن كل شيء ممكن يختفي فجأة.....58.
41. أحلام للبيع - عن الأحلام اللي بعناها بسبب الواقع.....59.
42. حين نصبح بلا ماضي - عن فقدان الذكريات أو الهروب منها.....60.
43. منطقة رمادية - عن المشاعر اللي مش واضحة، لا حب ولا كره.....62.
44. متى نرتاح؟ - عن التعب اللي ملوش راحة.....64.
45. رسالة لنفسي - عن الحاجات اللي كنا محتاجين نسمعها زمان.....65.
46. أيام ضائعة - عن الأيام اللي راحت من غير معنى.....67.

## دار قهوة الأدباء للنشر والتوزيع الإلكتروني

47. بين القلب والورق - عن الكتابة اللي بنهرب بيها من مشاعرنا.....68.
48. حكاية لم تكتمل - عن العلاقات اللي كان ممكن تكمل لكن مقدرتش.....69.
49. ربما يوماً - عن الأمل اللي بنتمسك بيه رغم كل شيء.....70.
50. آخر سطر في الحكاية - عن النهايات اللي مش دائماً سعيدة.....71.